



Nyynzäänte Joorgang

Fasnacht 2016

## Die Gsalzene

Vor de Waale fir dr Bundesroot, das loot sich nid negiere  
Hett's dr SVP an Fraue gfäält zem unser Land regiere  
- Dr Vorstand isch sich ainig, dass es neil Fraue bruucht  
Drumm mäldet si sich alli aa bi „Bauer ledig sucht“!

D'Angi Merkel het in Bärn dr Eeredoggtter iberkoo  
Wo sie nach gschlagne siibe Joor erschynt, do meint dr Räggtter froo:  
„Schöön heit dir so schnäu dr Wääg do hääre gfunge us em Norde,  
Wüu grad geschter simmer mit dr Ehreukund fertig worde.“

E Nasa-Mediekonferänz het kiirzlig d'Wält bewegt  
Uff em Mars haig me e primitivi Lääbensform entdeggt  
Die ainzig Froog sig no: Wie kennt me die Amöbe kondaggtiere?  
Unsre Vorschlaag: Dient's uff jede Fall mit Ziiridytisch broobiere!

Fanatistische das sin Mensche, die wänn d'Wält indoggtiniere  
Extremistische das sin Fundis wo sich um d'Gsetz dien futiere  
Wenn so Lyt wotsch finde, kasch dr d'Rais in noche Oschte spaare  
Lueg nur d'Veeloofaarer aa wo näb' dir iber s'Rootlicht faare

Dr Gepetto seit: „Pinocchio mir mien dini Naase theschte.  
Wie erraiche mir die maximali Lengi ächt am beschte?  
Kum neecher, glaine Holzkopf, und denn flischtrisch in mis Oor:  
„D'Krankekasseprämie styyge nit im näggschte Joor!“

Völkerwanderig und d' Bolizei duet d' Gränze kontrolliere  
Menschemasse pilgere – die ganzi Sach kennt eskaliere  
Vom andre Land verspräche si sich Woolstand, sueche s'Seeleheil  
Das sin im 8er unsri Wirtschaftsflüchtling uff em Wääg nach Weil

Bim Hömli-Friidhoof z' Rieche muess me d' Oefe repariere  
Bis das fertig isch mien Basler sich in Ziiri loo greimiere  
Wenn denn e Bebbi mit 'me Schnuppe stirbt und sich vom Lääbe drennt  
Wird in Ziiri s'erschte Mol e Basler Böög vrbrennt!

Und sott dr Schwyzer vo dämm Joor sich uff die letschi Rais begää  
Wurde d'Zircher d' Gremation vom Polo Hofer ibernää  
So wie dä sich immer zudröont hett – das hänn si schnäll begriffe  
Kennt die ganzi Stadt sich an simm letschte Räuchli go bekiffe!

Au dr Terrorischt muess zue sich luege, sott sich gsund ernääre  
Wie das hitte lauft dien d'Gsundheits-Spezialistische uns erglääre:  
„Die ainte, wo Veganer sin, die nennt me ‚Salatistische‘  
Und die wo gärn emol en Esel mampfe, haisse ‚Salamistische‘“

Gnabb 7 Kische Schmiirgäld – d' Fuessball-WM duet fascht nyt me koschte  
Mir drei hänn zämmgleggd und mechte uns jetz au so aini boschte  
Doch als alti Speggulante dien mir waarte, bhalte d' Rue  
Will im Uusverkauf gäb's schyyn't's no d' EM koschteloos drzue

### und dr Monschervärs

In ere dunggle Gfängniszälle  
mache d'Knackis froo e Wälle  
Die maine Grund zer Stimmig z'haa  
Hit kemme d'Fifa-Bosse aa

Im Fimfstäärn - Hotel Baur au Lac  
Woont e mäng' korrupte Sagg  
Dangg dr Zircher Bolizei  
Sinn dert jetzt eefters Zimmer frei

Wär kennt d' FIFA jetzt verwalte  
Und dr Betriib uffrächt erhalte?  
S isch glaar, dass das nur d' Butzfrau schafft  
Die sitzt als ainzig' nid in Haft!

Vom FIFA-Kassier isch z'erfaare  
Jetzt kennt me richtig Speese spaare  
Vorstandssitzige mit Znacht  
Miech me im Gfängnis, Zälle acht!

En Uffschrei goot durch d'Fuesball-Wält  
E WM kaufsch fir wenig Gäld  
Die Dytsche hänn e WM gstoole  
das kennt me sunscht nur vo de Poole

Dr Kaiser Franzl Beckebauer  
Vom IQ här kai Gassehauer  
Verträgli unterschriibd är gäärn  
Doch vorhäär lääse liggt im fäärn

D'Schwyz - brav und gwisshhaft  
Hätte sich gärn e WM bschafft  
Mit Schmiirgäld miechte si gärn Drugg  
Doch d'Meerwärtstyyr die wänn si zugg!

Dr Mafiaboss sait zue sim Soon:  
„Du bisch e Weichei, s'isch e Hohn!  
Wird griminell, mach uns kai Schand  
Als erschts wirtsch FIFA-Praktikant

Fir d' Blatter-Noochfolg diens di zwinge  
E Stroofregischeruuszuug z'bringe  
Denn ooni Vorstroof - s'isch banal  
Hesch kai Chance uff e Waal

Als Noochfolg fir dr Seppi Blatter  
Bewirbt sich au dr Hailig Vatter  
Doch „nai“ said d'Ethikkommission  
„Bi uns schafft kain fir Gottes Loon“

Us Jordanie dr Prinz Ali  
Isch dr ainzigi Normali  
mit im do wurd dr Fluech durchbroche  
är isch beschnitte, nit bestoche

„D' Bolytigg sott d' FIFA rette!“  
Dänggd s' Doris Leuthard sich bim glette  
„Mr kennt dr Ueli Murer wääle  
Dä wurd bi uns uff kai Fall fääle!“

Die Situation kennt eskaliere  
Wie sotti d' Schwyz druff reagiere?  
S' gitt nur ai Wäg us däre Noot  
Die Gsalzene in Bundesroot!

### Die Gsalzene findsch im Facebook

Wotsch d Fasnacht mol vo inne gsee - kumm doch zue dr BSG!

[www.schnitzelbangg.ch](http://www.schnitzelbangg.ch)